

DVADESET GODINA DJELATNOSTI MJEŠOVITE SREDNJE ŠKOLE „DOBOJ ISTOK“ (1993 - 2013.)


(Prikaz)

Tekst najnovije knjige profesora Osmana Hadžića iz Doboj Istoka, ponovo govori o bogatoj kulturnoj historiji ovog područja.

Inače, Osman Hadžić je već objavio veći broj knjiga na temu Doboj Istoka, što je jedan poseban fenomen. Koliko znam, ne postoji neko drugo područje ovog dijela Bosne i Hercegovine, o kome je jedan autor napisao toliki broj knjiga. Uporedimo samo središte kantona, Tuzlu, koja nema toliko knjiga od jednog autora.

Ova najnovija knjiga na gotovo 400 stranica, daje jedan do sada neistraženi segment kulturne historije ovog područja, onaj o razvoju srednjeg obrazovanja. Knjiga pod nazivom „Dvadeset godina djelatnosti Mješovite srednje škole „Doboj Istok“ (1993-2013)“, govori o nastanku, razvoju i brojnim obilježjima ovog nivoa obrazovanja.

Stjecajem historijskih okolnosti od 1992. godine, područje sadašnje općine Doboj Istok (nekoliko naselja istočnog dijela ranije općine Doboj) egzistira i razvija se kao jedna posebna društvena cjelina. Shodno tome, javila se potreba za ustrojavanjem i institucionalizovanjem funkcionisanja jednog važnog društveno-obrazovnog segmenta, kao što je srednjoškolsko obrazovanje.



Autor u knjizi „Dvadeset godina djelatnosti Mješovite srednje škole „Doboj Istok“ (1993-2013)“, upravo i govori o nastanku, razvoju i brojnim elementima i obilježjima ovog segmenta.

Profesor Osman Hadžić u ovom tekstu piše o razvoj pisama i školstva, djelatnost Mješovite srednje škole, kao najvažnijeg dijela knjige, te o nekim historijskim obilježjima i znamenitostima područja Doboj Istok. Pregledajući navedeni tekst čitalac dobiva uvid u ovu problematiku, njene najvažnije faze i brojne zanimljive detalje.

Generalna ocjena vrijednosti ove knjige ide u pravcu da ona daje dobar pregled nastanka, razvoja i savremenih karakteristika srednjeg obrazovanja kao i da donosi pred čitaoce detaljni pregled problematike rada i značaja Mješovite srednje škole „Doboj Istok“.

Pored dobrog i detaljnog pregleda navedene problematike ova knjiga donosi i niz stručnih vrijednosti, koji do sada nisu bili poznati u struci i koji mogu poslužiti kao doprinos za nova slična istraživanja.

Nekoliko narednih detalja iz ove knjige zornije govore o prethodnom:

- Na stranicama ovog teksta autor donosi vrlo koristan spisak naziva maturalnih radova učenika Ekonomske škole. U njima su obrađene brojne firme sa područja Doboj Istoka u zadnjim godinama, što može biti dobar izvor za istraživanja savremenih ekonomskih tokova na području Doboj Istoka.
- Kod stručnjaka će zasigurno oduševljenje izazvati, slobodno možemo reći, nevjerojatna fotografija na strani 238 koja prikazuje izorane arheološke predmete. Takvo bogatstvo arheoloških artefakata se zaista rijetko viđa. Otvara se pitanje hitnog istraživanja lokaliteta Kratine u Maloj Brijesnici i njegove zaštite.
- Na kraju knjige su zabilježene i dvije izvorne narodne pjesme ovog područja, kao doprinos autora ukupnom poznavanju kulturnih prilika Doboj Istoka.

Među značajne vrijednosti ove knjige spadaju i dijelovi teksta koji govore o Odbrambeno-oslobodilačkom ratu 1992-95. Tu se govori o pripremama za odbranu 1992 i ratnim zbivanjima do kraja rata.

Knjiga donosi veliki broj imena i prezimena ljudi, kako učenika, tako i onih koji su vezani za razvoj srednjeg obrazovanja na području Doboj Istoka. Pored brojnih imena prosvjetnih radnika koji su doprinijeli razvoju srednje školstva treba spomenuti i sadašnjeg direktora škole profesora Mustafu Spahića.

Također, istraživanje i opisivanje nastanka i razvoja srednjeg školstva kao i Mješovite srednje škole „Doboj Istok“, umnogome govori i o samom nastanku i zaživljavanju općine Doboj Istok.

I na kraju treba istaknuti i veliki broj fotografija, koje na izvanredan način upotpunjuju ovaj opširni tekst.

Ova knjiga je izašla 2013. godine u izdanju JU Mješovita srednja škola Doboj Istok, na 390. strana.